

**Najib Tiba Di Jakarta Sempena Pelantikan Jokowi
Bernama
Oct 19, 2014**

JAKARTA, 19 Okt (Bernama) -- Perdana Menteri Datuk Seri Najib Tun Razak tiba di sini petang Ahad untuk menghadiri upacara mengangkat sumpah Joko Widodo sebagai Presiden Indonesia pada Isnin.

Pesawat khas yang membawa Najib, yang diiringi isteri Datin Seri Rosmah Mansor, mendarat di Lapangan Terbang Halim Perdanakusuma pada kira-kira 6 petang (7 petang waktu Malaysia).

Ketibaan Najib disambut Duta Malaysia ke Indonesia Datuk Seri Zahrain Mohamed Hashim dan Wakil Tetap Malaysia ke Asean Datuk Hasnudin Hamzah serta pegawai kedutaan Malaysia.

Perdana menteri adalah antara 18 pembesar dan kenamaan asing menghadiri upacara bersejarah itu, yang dijadual berlangsung pukul 10 pagi Ahad (waktu tempatan), untuk menyaksikan Joko atau lebih dikenali sebagai 'Jokowi' dilantik Presiden Republik Indonesia ketujuh.

Najib juga dijadual mengadakan pertemuan dengan Perdana Menteri Australia Tony Abbott dan Setiausaha Negara Amerika Syarikat John Kerry selepas upacara itu, sebelum berlepas pulang ke Kuala Lumpur pada Isnin malam.

Jokowi mengambil alih jawatan itu daripada Susilo Bambang Yudhoyono, yang menjadi Presiden Indonesia sejak 2004.

Jokowi, yang juga Gabenor Jakarta, dan gandingannya Jusuf Kalla memenangi pilihan raya Presiden selepas menewaskan Prabowo Subianto dan gandingannya Hatta Rajasa.

-- BERNAMA

Copyright © 2014 BERNAMA

Source :<http://www.bernama.com/bernama/v7/bm/newsindex.php?id=1078077>